

江 允 虎

新 俄 遊 記

商 務 印 書 館 發 行

# 江亢虎新俄游記

(天我通信)

第一次 民國十年四月二十七日

## ●哈爾濱旅况

今日爲自北京出發之第四日。卽抵哈爾濱之第一日也。此行已換火車三次。不啻經行三國。自北京至奉天爲中國國有路線。自奉天至長春爲日本南滿路線。自長春至哈爾濱爲舊日俄國東清路線。今雖收歸中國管理。而執事仍皆俄人也。自行旅眼光觀察之。三線路政車務及招待情形。南滿最佳。京奉次之。中東(卽前東清)爲下。行車不按時刻。賣票不照章程。車中毫無準備。雖頭等亦凌亂蕪穢。俄人往往越等乘車。致通行處擁擠阻塞。水管汽爐皆不適用。憶十二年前自歐回國。經過此段。殊不如此。又聞人言。長哈鐵路向來收入最豐。俄人每年倚此贏利。挹注他路。今則竟不敷開支。自俄國革命以來。商務不通。行人裹足。是其主因。然管理失宜。流弊百出。亦實無可諱言也。

入哈爾濱第一感不便者。卽道路之崎嶇是也。哈埠分道裏道外。以中東路軌爲界。道裏爲俄租界。道外則華界。地面遼闊。街衢亦寬廣。惟均以泥沙或石塊成之。北京二十年前所謂「無風三尺土有雨一街泥」者。哈埠今日猶此觀也。且交通具惟恃馬車。又皆敝篷。粗陋惡劣。危險尤甚。斷轅脫輻乃習見之事。近來已有膠皮輪人力車。然其危險且較甚於馬車。馬車視北京驟車爲輕便。然正以其輕便。故顛簸彌劇。而危險程度亦加高。道裏間有數街平坦可疾馳。至於油塗木砌則概乎其未聞也。（曩游南京。嘗歎下關入城一帶爲畏途。以視此間道裏外之交通爲康莊矣。）哈埠生活程度至高。極粗陋惡劣之敝馬車。每時間亦需大洋一元左右。人力車稱是。食宿兩費亦較關內爲昂。旅館餐館多山東人營業。招待頗周到。飲饌亦豐腴。無論中西式。其分量皆視關內加倍。三人可分啖兩人之食而有餘。此間對外商業向以食料茶葉爲大宗。北部各省之生產物薈萃於此。故飲食原料價並不高。惟人工特貴耳。正唯是故。而遊手者鮮。人皆足以自活。乞丐所不經見。聞商業全盛時。商人之養尊處優窮奢極慾。彷彿曩日揚州之鹽商。白手自關內來者。力作三五年。皆可致小康。今已不然矣。工人最多者皆

在中東鐵路公司及附屬各工廠。有團體。有組織。近議加入俄人工團。俄新黨極表歡迎焉。

### ●中東鐵路(一)

中東鐵路本西比利亞鐵路之一部。東連海參崴。西至滿州里。而哈爾濱爲中樞。別分支線南下長春。與南滿鐵路連絡以達奉天。全路本皆俄人經營。中國名爲會辦。例不問事。自俄國大革命。中國得協約國之允許。代攬全權。特任前黑龍江督軍宋小濂爲督辦。留美學生王景春爲會辦。同時設護路軍及特別區管理處。取消俄人在哈埠一切政權法權兵權。然實際執事者仍多俄人。且多俄舊黨人。對於中國與俄新政府之交通。往往暗中牽制之。中國官吏軍警亦稽查森嚴。出入境至爲煩難。無護照者無論有護照者有時亦不免拒斥或拘留。聞有學生十二人。領得護照入俄。行抵滿州里而被扣。以過激黨嫌疑拘禁。黑龍江軍法署中。又有男女青年十二人。自滬來哈。居留月餘。不能領得護照。滿州里爲中俄交界處。雙方之偵察尤苛。且每星期僅通車一次。而又有時有意外之阻。如此次因冰融水漲。一橋垂圯。現方從事修理。聞至早非五月五日

不能竣工。往來者惟有坐候而已。遠東共和國駐哈代表阿雜甯君來見。自云新自赤塔抵此。甫下車即得橋危路梗之耗。現已電催速修。一俟宣告通行。余等即首途北上矣。

第二次 十年五月三日

●中東鐵路(二)

行路之難莫難於入俄矣。第一難關中國政府之允許。第二難關俄國新黨之介紹。第三難關兩國交界之檢查。一切通過矣。而交通之停頓。食物之缺乏。以及意外之危險。尚有命運存焉。中國自停止俄國使館待遇後。外交部已不復發遊俄正式護照。至有特別事故請願旅行者。由外交部之通商司查明屬實。給以俄文證明書。爲護照之代用。然後請俄新政府之代表加以簽字。(此層仍非正式)并須索得特別介紹書。聲明此人入俄無害於新政府之設施。然行抵中俄交界處。雖有合格之證明與有力之介紹。尚往往不免受中國或俄國軍官之抑止。余等此行第一第二難關早已不成問題。又得中東鐵路宋督辦特贈頭等免票。并許附專車直達赤塔。則第三難關亦迎刃可

解。不意滿赤中間一橋梁因冰化水漲而中梗。候至十日。尙未修復。臨河而嘆。無聊至矣。

試披地圖。滿赤中途。有河流焉。名曰鄂嫩。原建鐵橋。工程偉大。當謝米諾夫黨軍侵略時。架巨砲實炸藥轟毀之。赤塔政府成立。別修便橋。以通火車。橋工草率。屢修屢圯。當茲春融。冰塊順流而下。至四月下旬。卽告警停車。而橋實未斷。冒險者尙可款步而過。然履行枕木。俛視洪流。滅頂之凶。失足之恨。咸有戒心。况行李食料。均不便取攜。故余等寧隱忍坐候而已。昨得赤塔車務公司專電。本月八日可望通行。聞者舉額手相慶。特慮其消息仍不可恃耳。日前赤塔政府本有正式通告。準期五月五日開車。今竟無聞矣。

### ●外蒙失守追述

旅况無聊中。得遇軍界三要人。同寓此間新世界旅館。因得過從談話。一江中將壽祺。奉中央命令前往赤塔。宣慰難僑。并答謝赤塔政府保護接濟之誼。一褚旅長其祥。自庫倫敗退。經赤塔而來。一路都護副使邦道。自恰克圖出走。亦經赤塔而來。江中將爲



當日與日本簽定軍事協約之一人。此次見協約取消。而日軍未退。東清沿線。仍有日人軍站及軍用專車。并聞有暗中接濟俄舊黨及蒙叛軍之事。言時至爲憤慨。褚旅長自述庫倫失守之經過。以爲大原因在事權不一。軍帥不和。方針不定。陳鎮撫使未到時。活佛及王公均已帖就範圍。并受我軍軟禁。又屢挫俄舊黨凶鋒。陳使一到。力主懷柔。放走活佛。形勢驟變。陳本書生。不知軍事。顧好自用。時掣其肘。以致出發不發。戒嚴不嚴。俄蒙應合。全局糜爛。外蒙遂入恩琴掌中。（恩琴本德人。入俄籍。封男爵。隸謝米諾夫部下。爲舊黨最驍勁者。）陸使固守恰克圖。本意聯紅軍以攻庫倫。外交部拒斥之。紅軍遂鈎結蒙民黨。佔據買賣城。陸使僅以身免。幸商民事前多已遷出。損失尙非全部。今兩君部下皆流落蒙疆。迫爲寇盜。漢蒙互相仇殺。前途益不可問矣。陸君十年舊交。儒雅猶昔。嘗賦詩自見。余依韻和之。兼示褚將軍。詩曰。把酒從君更問天。中年哀樂集尊前。素心欲掇雲間月。白骨空縈塞上煙。七尺屍終教革裹。四方志莫負弧懸。相逢恥作南冠泣。捲土猶須靖一邊。

●滿赤道中

鄂嫩河之流冰期已過。便橋工竣。於是久斷之西比利亞鐵路又勉強通車矣。余等於五月八日得此確耗。十一日自哈爾濱首途。越興安嶺而抵滿州里。約經四十小時。滿州里爲中東路最後大車站。自俄舊黨佔領庫倫以來。宣布戒嚴。行人於此檢驗護照。換乘西比利亞通車。又行時許。達十八小站。乃中俄交界處矣。彌望平原。赤野千里。車頭火星飛燒道傍枯草。奇觀得未曾有。鄂嫩河大鐵橋毀於謝黨。修復綦難。便橋架石爲之。車過時岌岌可危。沿途車站。略有居民。多事畜牧。然景象荒涼。時見紅白戰爭遺蹟。蔓草縈骨。荒煙斂魂。爲之感喟不已。

余等有列車十四。山行時每用兩車頭。一推之一挽之。車中不備食宿。宿事非難。因人數少而車位寬。隨處可安頓行李。食則乾餒冷炙。隨身自攜。過滿州里并熱水亦不可多得。每經大站。可下車自汲。然擁擠費時。余見兩華人。因汲水與俄人爭鬩。被路警拘留。旅人有自烹爨者。間有一兩站可購麵包。而價則視在華倍蓰矣。滿州里各物已大昂。惟鷄卵松子極廉。旅人爭購食之。并儲爲宿糧焉。



滿州里至赤塔距離不及哈滿之半。而車行至三晝夜有奇。燃料缺乏。軌路崎嶇。而停頓尤多而且久。屢有軍警上車。檢驗護照。詰問口供。自去冬瘟疫盛行。俄人於途中設隔離所。由華來者除專車外。皆須停留五日。無病乃聽放行。盤查對俄人特嚴。防舊黨之混入也。

余等頗受優待。上車一視即去。行李皆免驗免稅。同行沈總領事之行李車。途中被竊。失物兩件。又一列車機器油流逸。致輪軌摩擦起火。招待者告余。此皆舊黨奸人所爲。以傾陷新政府者。其信然乎。

●赤塔見聞雜記(一)

五月十七日凌晨。車達赤塔第二站。近城市處。中國領事館華僑聯合會以人來迓。城市大約哈爾濱三分之一。居民不過十萬人。華僑占七八千。道路寬闊而失修治。如行沙漠中。市况極蕭條。商肆多閉歇。大建築物惟車站、國會、政府、教堂及二三旅館而已。國會本一大百物店。政府則此間一富翁舊居。行政各機關皆在焉。中國領事館湫隘不可觀。華僑聯合會尙爽塏。會長洪堃今在京。副會長李鴻昇。此間商人也。別有華工

聯合會。由學界青年公請連崑諸君主持。贊同社會主義。聯絡遠東政府。比較有生氣。與華僑聯合會如新舊黨派勞資階級之不相能。自俄新黨設立政府以來。中國領館及僑會竟未與爲一度正式接洽往來。并未取得此間政府之承認。以致諸事棘手。轉運難民保護僑工悉賴中央及東省特派專員會同工會爲之。此不得謂非後時而失算者矣。

余抵赤塔之日。卽往見政府諸君。外交次長代總長斯克威斯愷 *Skatitsky* 交通總長沙託夫 *Shatoff* 皆留美有年。爛熟英語。沙君乃 *T. W. W.* 一黨員也。內閣總理尼愷佛洛夫 *Nikifaroff* 西比利亞人。沈默質樸。大總統（實行政委員會長）克拉斯諾學闊夫 *Krosnoshepot* 美國籍民。居留新大陸十五年。曾在芝加哥爲律師。大病新愈。接晤甚歡。爲人和平謹慎。熟悉中國國情。國會主席希洛夫 *Shiroff* 社會黨健將。奔走革命。屢將大軍。曾任阿穆爾省督軍。聞余將來。專使問訊。特表歡迎。譯談經時。遠東新定憲法。國會互選行政委員七人。七人公推會長。執行大總統職權。會長任命內閣總理。自由選用閣員。惟須得國會同意。此屆國會多數黨人雖居多數。然他黨亦

平等列席。國體既名共和。自不同共產政府。故財產私有。商業往還。金錢通用。略如他國。國會并許外人投資。新與英商簽定一金鑛約章。准專利三年云。

赤塔諸事樸素。近以金融停滯。物品稀尠。國會政府諸公皆極堅苦刻勵。除食料外。不支薪俸。亦無制服。官吏多著黑粗布襯衣。午食惟牛乳一杯。麵包兩片而已。治事時間。十時至三時。大小駿奔。煩勞而迅捷。見人皆和藹而可親。開國精神。令人欽羨。女子執事者甚夥。勤苦操作。尤勝男人。半皆短髮敝服。亦間有修飾塗抹者。物價奇貴。大約旅館一宿五盧布。餐館一食三盧布。剪髮兩盧布。洗衣每件半盧布。衣履什器。供不給求。雖富無用。小商業多在華人手。自大商肆閉歇。街頭巷尾。皆見華商攤市。趨之者如鶩焉。

第四次 十年五月廿二日

●赤塔見聞雜記(二)

赤塔。西比利亞一小車站也。遠東共和國成立以前。并無軍事上政事上重要關係。全市分第一第二兩部。第一部在西北。農人(畜牧業)居之。第二部略有市廛。今爲京兆

矣。四面皆山。中有河水。畜牧之外。則林業漁業爲大。然規模狹隘。組織粗疏。如西歐十八世紀時。窮陬僻壤。且往往見初民生活狀態焉。西比利亞民族本最複雜。斯拉夫外。多糞膚黑髮之人。驟見幾疑爲華種。實此間土著也。成吉斯汗之子孫蕃衍自成一部落。今大名鼎鼎之白黨首領謝米諾夫。卽元裔也。外蒙古人歸化者。逐年增加。此次列席憲法會議者。蓋二十餘名云。

華僑多直隸山東山西東三省人。大都小本經營。往來飄忽。居留者不滿千人。悉畜俄婦。或入俄籍。大有樂不思蜀之意。尤有長衣編髮者。因而不革。同而不化。甚可怪也。以上各省與俄鄰近。移民固意中事。乃竟有上海寧波成衣匠三四家。湖北天門眷屬男女二三十人。習俗語言。自爲風氣。據天門人言。以荒年逃難步行來此。并有遠赴西歐各國者。男子洗衣理髮。婦人賣紙花挑牙蟲。小兒則耍武藝變戲法。以是環游全球。傳食都市。更有醜業。則男子吸鴉片。婦人翹纖趾以示人而斂錢。聞俄國各處鴉片賭博娼妓三者。幾爲華人專利營業。嗚呼噫嘻。

此間日本人極尠。而高麗人則頗多。獨立黨、社會黨、勞工會皆分設機關。并有在俄國

政界軍界執役者。自兵工農政府（俗稱勞農政府）承認以海蘭泡附近爲韓人革命根據地。旅俄韓人輻輳其間。聞已有節制之師八千人。摩厲以須。乘時而動。日人之防範亦綦嚴。時或侵入華俄國界。搜捕韓國黨人。我國東省軍警亦助虐焉。故韓人皆以俄爲唯一逋逃藪。而俄日兩國之惡感乃緣是益深。日本於是扶掖謝黨。以圖報復而肆侵凌。顧池魚之殃。反在我國。此外蒙古之所以風雲變色也。

今日得一消息。海參崴有一日本人家。藏匿謝黨廿四人。及軍械機關鎗多事。爲俄軍事偵探所破獲。俄政府擬更搜檢他日本人有嫌疑者。日人不服。反遣憲兵搜檢俄人家。并拘捕俄軍官數人。市民大譁。旋被釋放。此事如何了結。尙不可知也。又得一消息。日本政府將提出要求八條。限遠東政府兩星期內答覆。大旨遠東須確定共和政體。不得推行共產主義。沿海州須開爲通商口岸。并於各要地設置租界。外人在遠東須有開礦購地築路等權云云。日本某報斥此爲無根之風說。然遠東政界。則信爲日人一種陰謀。別有其他作用者。

中國外交代表總領事沈崇勳君。到此已一星期矣。僅一見外交次長斯克威斯愷。尙

未正式訪問總統及內閣也。美國外交代表駐東京使館參贊阿白特君。A. White 以星期三到此。昨日非正式謁見總統克拉斯諾學閣。夫同行武官一人。通譯一人。住專車中。據云。此來專爲普通視察。無交涉立約之權。然美政府將依其報告以定對遠東外交之方針。阿君擬句留十日。卽返東京。然後挈眷回美。報告遠東近狀云。

第五次 十年五月廿七日

●赤塔見聞雜記(三)

第二赤塔政府建築物左近有一大公園。畧備林泉之勝。平時午後啟門。縱人遊覽。星期加設音樂跳舞。入場者收券資銀幣五角。小兒二角。余嘗兩至其處。星期人極擁擠。餘日寥寥三五而已。音樂甚佳。跳舞則凌亂無節次。意取同樂。不復檢束。自英法紳士社會觀之。此爲鄙野無狀至矣。公園有音樂者僅此一處。而劇場跳舞場音樂佳者尙甚多。惟收費絕昂。然俄人天性嗜音樂。雖重賞不恤也。此間公私治事。至遲午後四時截止。晚飯後居人縱步街衢。或齧集行樂場。熙熙焉忘其憂勞。惟法禁綦嚴。夜中十二時一律熄火。行人須持特別護照。并逐段受盤查。軍士荷鎗巡行。時聞呼哨聲。此其與



太平景象不同者。

赤塔商業凋零。物品缺乏。具如前述。業貿易者。多猶太人及中國人。店肆而外。別有日中大市場。早八九時至晚三四時。四民偕來。百貨萃止。彷彿北京之天橋。上海之城隍廟。惟遊戲品較少。而食用品較多耳。鄉村婦子舉豚蹄匹雞牛乳鷄卵負戴而來。綠衣紅裳。五光十色。尤有蒙古美人冠纓編髮。長褂高鞞。與斯拉夫人哥薩克人布利亞人往來參伍。如入萬國和平會場。誠世界大觀也。幣制尙未劃一。金銀漲落不常。自國會議定取消紙幣。俄帝國時代金銀銅鈔。中國之大洋。日本之金票。一例通行。大約金盧布一可值銀盧布三四之間。大洋金票畧與金盧布相埒。最可異者。大洋他種概被屏斥。惟袁世凱像一種。(俗稱袁頭)特受歡迎。洪憲皇帝之餘威。死後猶震於殊俗如此。亦足豪矣哉。

各國華僑程度之低。當無甚於旅俄者。偶錄風聞一則。其餘可概見也。遠東有華僑總會。主持者姑諱其姓名。聞有董事數人。絕不通華俄文字。亦並非正式工商界人。假僑會名義。與前領事館表裏結納。魚肉善良。華僑註冊者。外交部定章收費每人每年大

洋一元。其權本在領事。此間則由僑會代行。每次勒索三元。且延擱恆亘十數日。欲速辦者。尙須加費若干。又巧立名目。徵收月捐。大戶五元。小戶三元。設攤市者。亦出一元。月初徵捐。急於星火。每延一日。加罰子金。過月不交。勒令封閉。尤駭人聽聞者。僑會自置警察。自開法庭。誅求不應者。輒處以非刑。杖脊答臀。幽閉圈禁。內地所已取消者。今竟移植於外國。僑民蠢於鹿豕。馴於羔羊。忍氣吞聲。甘受宰割。有往請見領事者。皆受叱逐。若曰。領事大人豈肯見汝輩小民。稍逡巡者。將片送僑會受責耳。去年北省旱災。僑會勒捐每名三元。有一賣菜者語近抗違。立判罰三十元。并拘禁三十日。棍打三十次。此事親聞。一上海成衣匠述之。在俄華僑約十萬人。以三元計。當得三十餘萬元。究不知入我災民口腹者幾何。可痛也已。茲當領事交代之時。深望僑會有改組之日。蕩瑕滌垢。除舊布新。毋使黑幕重重。爲同胞所哭。爲外人所笑。則厚幸也。

### ◎第一赤塔游記

自抵赤塔。小住爲佳。忽忽已十日矣。此十日間。訪問參觀。殆無虛晷。日前偕社會黨宣傳部幹事夫利得君 Федя 夫婦共乘汽車。一遊第一赤塔及豈嫩 Байкал 湖。第一赤

塔居民不過第二赤塔五分之一。農牧而外。多鐵路工人住家。沿途見謝黨焚掠遺跡。聞紅白軍死骸多渴葬郊原。冰化沙流。往往見敗體斷骨焉。豈嫩湖外阻岡巒。中臨平曠。方舟游泳。夏季爲宜。惜道路失修。且毫無點綴。故遊賞者甚稀。附近皆林場菜圃。當夕陽西下時。野老荷鋤。村婦抱甕。一幅絕妙幽風圖也。

今將去赤塔。西遊西比利亞各城而入莫斯科矣。嗣後通信倘無阻閱。當續敘兵工農政府下事。請暫與遠東共和國別。拭目以觀蘇越特之俄羅斯。 Soviet Russia

第六次 十年六月十五日

●西比利亞道中(一)

余等今在俄國革命中心之莫斯科矣。自赤塔至莫斯科。在平日快車一星期行程耳。余等則滯留至三星期以上。此三星期中。因車輪損敗。停止修理者三次。共耗時二分之一。餘則晝夜躡行。惟逐站停車。或數十分。或數小時不等。茲特追憶沿途之見聞及感想。約略述之。

自赤塔出發爲六月一日。與遠東共和國總統克拉斯諾學闊夫及陸軍總司令馬鐵